

Nipisanniarneq pillugu Namminersorlutik Oqartussat nalunaarutaat nr. 2, 2. februar 2016-imeersoq Atuussimasoq (Historisk)

Inatsisartut inatsisaat nr. 18, 3. juni 2015-imeersoq aqqutigalugu kingullermik allangortinneqartumi Aalisarneq pillugu inatsisartut inatsisaanni nr. 18, 31. oktober 1996-imeersumi § 10 b, § 13, imm. 2, § 23, imm. 1, § 33, imm. 2 aamma § 34, imm. 3 naapertorlugit aalajangersarneqarput:

Atuuffia

§ 1. Nalunaarummi pineqarpoq tunngaviumik killeqarfiup avataani 3 smilimiittup sineriaallu akornanni Kalaallit Nunaata aalisarnikkut oqartussaaffigisaani nipisanniarneq.

Nassuiaatit

§ 2. Nalunaarummi matumani Kalaallit Nunaata imartaq aalisarnikkut oqartussaaffigisaa tassaavoq Kalaallit Nunaanni aalisarnikkut oqartussaaffigisasaq pillugu kunngip peqqusineratigut Statsministeriaqarfiup nalunaarutaani aalajangersagaasoq.

§ 3. Nalunaarummi matumani inuussutissarsiutigalugu aalisarneq pisat tamarmiusut taakkualuunniit ilaasa tunineqarnissaat siunertaralugu aalisarnertut paasineqassaaq.

§ 4. Nalunaarummi matumani inuussutissarsiutiginagu aalisarneq nammineq pisat atornissaat siunertaralugu aalisarnertut paasineqassaaq.

Inuussutissarsiutigalugu nipisanniarnissamut piumasaqaatit

§ 5. Inuussutissarsiutigalugu nipisanniarniaraanni akuersissuteqartariaqarpoq, taanna Aalisarnermut, Piniarnermut Nunalerinermullu Naalackersuisoqarfimmu qinnuteqaateqarnikkut tunniunneqassaaq.

§ 6. Aalisarsinnaanermut akuersissutit sivisunerpaamik ukiunut marlunnut atuuttussanngorlugit tunniunneqartarput.

Imm. 2. Akuersissutip aalajangersakkat makku imarisinnaavai, qassutit qassit akuersissummi ataatsimi atorpeqarsinnaanerat, aqutsiveqarfimmi sorlermi aalisartoqarsinnaanersoq aamma aqutsiveqarfimmi ataasiakkaani piffissap qanoq ilinerani aalisartoqarsinnaanersoq.

§ 7. Piffissaq 16. juli - 28. februar inuussutissarsiutigalugu nipisanniarnissaq inertequtaavoq.

Pisassiissutit aamma piffissat aalisarfiusut.

§ 8. Inuussutissarsiutigalugu nipisanniarneq pisassiissutinik tunngaveqartumik aamma ullunik aalisarfissanik tunngaveqartumik ingerlanneqassaaq, tassa ukiunut ataasiakkaanut ullut aalisarfissat amerlassusissaat pisassiissutillu aalisarnermik ingerlatsinissaq pillugu Naalackersuisut akuersissutaat

naapertorlugu aalajangersarneqartarmata.

§ 9. Aqutsiveqarfinnut ataasiakkaanut tunngatillugu, tak. Ilanngussaq 1, najukkani tunisaqarnissamut sinniisuutitat aamma aalisartut kattuffiat isumaqatigiissuteqartarput qaqugukkut inuussutissarsiutigalugu nipisanniarneq aallartinneqassanersoq.

Imm. 2. Imm. 1 malillugu aqutsiveqarfimmi pineqartumi kingusinnerpaamik sapaatip akunnera ataaseq sioqqullugu nipisanniarnissap aallartinnginnerani Aalisarnermut, Piniarnermut Nunalerinermullu Naalakkersuisoqarfimmut nalunaarutigineqassapput.

Imm. 3. Piffissap aalajangersimasup § 9, imm. 1 naapertorlugu aalajangersarneqartup avataatigut inuussutissarsiutigalugu nipisanniarneq inerteqqutaavoq.

§ 10. Aqutsiveqarfinni ataasiakkaani piffissani aalajangersimasuni aalisarfissat aqutsiveqarfinnilu ataasiakkaani pisassiissutit tusagassiorfiit aqputigalugit aamma Namminersorlutik Oqartussat nittartagaat aqputigalugu nalunaarutigineqassapput. Pisassattaq tamarmik pisarineqarnerat nalunaarutigineqartassaaq.

Imm. 2. Piffissarititap § 6, imm. 1-imi oqaatigineqartup ingerlanerani allannguisoqarsinnaavoq, tak. aalisarneq pillugu inatsisartut inatsisaanni § 10.

Imm. 3. Aalisarnermut, Piniarnermut Nunalerinermullu Naalakkersuisoqarfiup aqutsiveqarfimmi piffissap aalisarfiussap qaangiunnerani pisassiissutit pisarineqanngitsut aqutsiveqarfimmut allamut nuussinnaavai.

Inuussutissarsiutigalugu nipisanniarnep unisinneqarnera.

§ 11. Aalisarneq unisinneqarpat nammineq aalisarnermi atortut tunngavilersuutitaqanngitsumik qaqinneqassapput.

§ 12. Ullut aalisarfissat pisassallu naammatsippata § 8 eqqarsaatiginagu nipisanniarneq ingerlaannaq unisinneqassaaq.

Inuussutissarsiutigiginagu nipisanniarnep.

§ 13. Piffissaq 16. juli – 28. februar inuussutissarsiutigiginagu nipisanniarnissaq inerteqqutaavoq.

Imm. 2. Piffissap inuussutissarsiutigalugu aalisarfissatut aalajangersarneqartup avataani inuussutissarsiutigiginagu aalisarnissaq inerteqqutaavoq.

Imm. 3. Nammineq atugassatut nipisanniarnep danskit naalagaaffianni innuttaassusilinnut Kalaallit Nunaanni najugaqavissunut tamanut akuerisaavoq. Nunani allani innuttaassuseqartut Danmarkimeersuunngitsut Kalaallit Nunaanni najugaqavissut aammalu ukiuni marlunni ataannartumik najugaqareersut danskit naalagaaffianni innuttaassuseqartunut naligitinneqassapput.

Imm. 4. Inuussutissarsiutigiginagu nipisanniarnep atillugu annerpaamik qassutit marluk atorineqassapput.

§ 14. § 5, § 6, imm. 2, § 7, § 9, imm. 3 § 12 aamma § 13 unioqqutinneqarpata akiliisitsinermik kinguneqarsinnaapput.

Imm. 2. Aktieselskabi, anpartsselskabi, andelselskabi imaluunniit umiarsuaatileqatigiiffik unioqqutisisimappat ingerlatseqatigiiffik pineqartoq taannaatillugu akiliisussanngortinneqarsinnaavoq.

Imm. 3. Pinerluttulerinermi inatsimmi arsaarinnittarneq pillugu malittarisassat taamatuttaaq atorneqarsinnaapput.

Atuutilersitsineq.

§ 15. Nalunaarut ulloq 15. februar 2016-imi atuutilerpoq.

Imm. 2. Ilutigalugu Nipisanniarneq pillugu Namminersorlutik Oqartussat nalunaarutaat nr. 6, 21. maj 2014-imeersoq atorunnaarsinneqarpoq.

Namminersorlutik Oqartussat, ulloq 2. februar 2016.

Karl-Kristian Kruse

/

Jørgen Isak Olsen